

Xujun xi tjun kits'ínntu nda postru Pedro

B'i ts'ín kikjaniñaha Pedro xuta ninku

¹ An Pedro, an nda postruhu Jesucristo tít's'inkjínnyu xujuin jun xi j'ájinnyu Ntíaná. Jun xi kindzjoyo ante Ponto nga tinimasún, ko ante Galacia ya, ante Capadocia, ante Asia ko ante Bitinia. ² Kikie títjunnyu Ntia Na'miná, kui nga j'ájihinnnyu ko Espirituhu kits'ín jennyu, tu xi kuínú'yá'éhen ruu Jesucristo ko tu xi tu ngat'aha jníhi Jesucristo kjuáts'ehennyu Ntíaná.

Kas'e nkjúnnyu kjuanda ko kjuajyu.

B'i ts'ín tsakúya Pedro ni xi ñá tjeheñná nga kuichú nistjin xi fekuu

³ Kan'etsjoho Ntíaná xi Ntiaha ko Na'mihí Nda Ntíaná Jesucristo. Ngat'aha kjuanimatak'un chánkaha kits'íntsin tsetse ngáhaná nk'ie nga kits'ínkj'áíya ngáha ra Jesucristo ajihin xutak'ien. Kui nga tichuyáhaná nga kuintsuba tík'aán ko ñá ⁴ ko nga n'ekjáíhiín ni xi tsjáná, ni xi najmi maha batsun ko najmi ma chuntí ko najmi maha 'meya, ni xi tjtjoho ndjiojmi ján ngandanuu. ⁵ Nga'yúhun Ntíaná tókunkohonnyu tu ngat'aha nga s'ejinnnyu. At'aha tjíndaha yjoho Ntíaná nga kuakúchji xi nkú ts'ín ts'íink'anki xuta xi ts'e nistjin xi fekuu.

⁶ Kui kjuaha nga kitsejihinnyu kjuatsjo, ndaha tsa chuba nistjin tjíhin nga n'e nibánennyu nkjin tíkja ni xi kuitjájiun. ⁷ Kui xi kuakúchji yáha jun

nga kjuaxi. At'aha nga s'ejinnuu, kui xi 'yún chji saha ra nga toonsinee. Ndaha tsa maha batsun toonsinee, tunga chasehé ra tu xi s'ejña chjihi tsa kui kjuaxi. Ko nk'ie nga s'ejña chji xi nkú ts'ín s'ejin kjuaxinnuu, nda ts'ín chubayanénuu ko sakúnnuu kjuachánka ko nda k'úinnuu nistjin nga kj'uaíkáuchji yjoho Jesucristo.

⁸ Tjonuu Jesucristo, ndaha tsa najmi yo nkú tjín. Ko ndaha tsa najmi tíyo nd'aj, tunga s'ejhínnuu ko tjínnuu kjuatsjo xi tjíhin kjuachánka, xi najmi yaá xi nkú ts'ín bixíyaá. ⁹ Tjinnuu kui nii at'aha tsakúnnuu nga tín'ek'ankinnuu, kui xi nibáha ra ngat'aha nga s'ejinnuu.

¹⁰ Já profeta xi kis'e nistjin nk'ie, xi kitsúya tíjün kjuanda xi sakúnnuu, kui xi kits'ínnkink'un nga kama chubayahá xi nkú ts'ín k'uankihi xuta, at'aha mjehe skue kui nii. ¹¹ Kama mjehe nga incha skue yá xutaha ko mí nistjihin xi y'ejña chji Espirituhu Cristo xi y'ejñajihin já profeta nga kitsúya tíjuhün kjuá'un xi tjíhin nga skue Cristo ko nga askahan s'e kjuachánka. ¹² Tunga Ntíanáhá tsakúchjiji já profeta xu'bo nga ni xi tíincha tsuya najmi kui kamats'e, nga ní ngandanuu b'a kitsúhu. Kui niu xi ta kitsúyanuu já xi y'énijmínuu én nda tsuhu Jesucristo. Nga'yúhün Espiritu xi kin'e nibáha ndjiojmi ján y'énijmíhinnuu. Ko ta ntítsjee mje nkjúhün nga skue nkú tjíhin ra ni xu'bi.

B'i ts'ín tsakúya Pedro nga tintsuba ndaá at'aha Ntíaná ja ts'ená

¹³ Kui b'a maha, chase sisihin ruu xi nkú n'oo. Nda n'enkjintak'un ko chuya k'unk'uhüun kjuanda xi kj'uaítsjánuu Jesucristo nistjin nga kuakúchji

yjohō. ¹⁴ B'a n'oo xi nkú ts'ín ntí xi nt'é'én. Najmi ta n'ehenu xi nkú ts'ín kinchja animanuu nistjin nk'ie, nk'ie nga najmi kjee yo Ntjaná. ¹⁵ Tsje katumo nginkun Ntjaná, xi nkú ts'ín tsje xi j'áinnuu. ¹⁶ At'aha b'i ts'ín tjít'a éhen Ntjaná: “Tsje katumo, at'aha tsjená.”

¹⁷ Xihi “Na'mihí” bixíhuun xi ngúsuhún basehe tsa nda kō tsa najmi nda ni xi ts'ín nga nkúnkú xuta, kui nga kas'enuu kjuabinkjuhun xi nkú ts'ín kuankinkoo yjonuu nk'ie nga tinimasún so ei asunnteí. ¹⁸ Yo nga kis'echjintjainuu tu xi kama ndáihinnuu nga chuba tintsubanú. B'a ts'ín tintsuboo nk'ie at'aha kui nihi xi y'éjñanuu ntje chánuu. Najmi toonsine kō tsa toontaba kin'echjén nga kis'echjintjainuu, ni xi maha batsun. ¹⁹ Jníhi ní Cristo kin'echjén, kui xi 'yún chjí. Xi nkúhu nku chutsanka kama Cristo, chutsanka xi najmi chumi nihi xi k'uhun kō xi najmi uhun.

²⁰ Kintehe ni nga kamanda asunntee kis'enda titjun ni xi ts'ín Cristo, kō nistjin feku xi kich'aá nd'ai j'aikúchji yjohō ngandanuu. ²¹ Ngat'aha Cristo s'ejihinnuu Ntjaná, kui xi kits'ínkj'áíya ngáha ra Cristo ngabayoo kō kitsjáha kjuachánka. Kui nga tín'e s'ejihinnu kō tíma 'yún tak'uhunnu Ntjaná.

²² Nd'ai ni nga ja kamaje animanuu at'aha kinu'yá'óhoon én xi naxu tjín kō nga tu xí ndahá ts'ín tjíyanuu nga n'etjō xuta ninku, kui nga ngayjee animanuu n'etjōhonu xinkiu. ²³ At'aha ja kitsin tsetse ngáhanu. Najmi kitsiun xi nkú ts'ín tsin xuta xi maha 'me. Éhen ní Ntjaná kits'íntsin tsetse ngáhanuu. Kui xi fi ndju. Najmi kamaha kfe.

24 At'ahā b'i ts'ín tjit'a xujun éhen Ntíaná:
 Ngayjee xutā, xi nkú joyaha jñá xi tjin.
 Kō ngayjee kjuachánkahā xutā,
 xi nkú joyaha naxúhu jñóo.
 Xi jñóo kō jne naxúu,
 25 tunga éhen Ntíaná santaha tū nkjéhé ni ngjuai
 ndju.
 Kui éen, kui én nda tsu xi ja kis'enijmí ajinnuu.

2

1 Kui b'a maha, n'e t'axíhinu ngayje
 kjuach'onk'un, ngayje ni tsank'á, kjuajohonkin,
 kjuaxintak'un kō ngayje tíkjá kjuachubatit'ain.
 2 Katumo xi nkú joyaha ntínta xi mje nkjühun
 ntáchiki. B'a ts'ín katuma mjenuu én xi ndoo. Kui
 xi tsjá nga'yúhun kjuankjintak'unnuu, tū xi b'a
 ts'ín saáhanu santaha nkúhu nga kjuáts'e sínnuu
 Ntíaná. 3 Xihi jahá kichjut'o ngandahā Ndā Ntíaná.

*B'i ts'ín tsakúya Pedro nga nku ndjio k'aku kits'ín
 ma Jesucristo nga y'éjña chubaya*

4 Nibák'un tiñohoo Ndā Ntíaná, kui xi nkú joyaha
 nku ndjio xi tíjña tík'un. Kikjaníya xutā ndjio xu'bo,
 tunga Ntíanáhá j'ájin ndjio kō nginkun Ntíaná 'yún
 chjhi rá. 5 Jun xi nkú joyaha ndjio xi tjintu tík'un, xi
 kin'endakoho nku ninku xi najmi asunntee y'ahā
 rá. Kin'e manuu já na'mi jehe Ntíaná xi tsjáha chje
 Jesucristo, chje xi nk'a ján tjehe rá. A Ntíanáhá
 tí'bohō kui chje nga b'a t'n'o, kui chje xi sasihin
 Ntíaná.

6 At'ahā b'i ts'ín tjit'a xujun éhen Ntíaná:
 An k'uejñá nanki Sion nku ndjio k'aku,
 xi j'ajián kō xi 'yún chjí.

Ndahachí najmi sakúhu kjuasuba
xuta xi s'ejihin ndjio.

⁷ Ngat'a ts'ajun xi s'ejinnuu Nda Ntíaná, chjíhi ra
kui ndjio. Tunga xi najmi s'ejihin, bitjusun má nga
b'i ts'ín tjít'a xujun éhen Ntíaná:
Ndjio xi kikjaníya já chjinejío,
kui xi ja j'ai ma ndjio k'aku.

⁸ Kó b'i tá títu ya:

Tsichu ma nku ndjio xi ts'ín saténki xuta,
nku naxi xi ts'ínxuntuu.

Saténki xuta xu'bo ngat'aha éen, at'aha najmi
nt'é'éhen éen. B'a maha xuta xu'bo at'aha ja b'a
ts'ín tjíña nga b'a kamaha.

⁹ Tunga máha jun, jun xi xuta xi kichj'ajin, jun
já na'mi xi ts'ínxát'aha xi batéxumaha nk'a ján,
tsjenú jun xi xuta naxinantáha Ntíaná, xuta xi
ja tsichu ma ts'e Ntíaná. B'a kin'e manuu tu xi
kuixinyahanu xi nkú ts'ín chánka xi j'áinnuu. At'aha
Ntíaná j'áinnuu nga kuitjujiun má jyuun kó nga
kuitjás'enjiun má nga ts'ín ndzjen kjuachánkaha.

¹⁰ Nistjin nk'ie, najmi xuta naxinantá kik'innuu,
tunga nd'ai ja tsichumo xuta naxinantáha Ntíaná.
Kó nistjin nk'ie najmi kichase nimanuu, tunga
nd'ai ja tichase nimanuu.

*B'i ts'ín tsakúya Pedro xi nkú ts'ín tjihin nga
kuankíkaá yjoná ajihin xuta xi tjín asunntej*

¹¹ Tjona jun, já nts'e. Tibankinuu nga t'ech'óho
yjonuu xi nkú ts'ín mjehe animanuu. At'aha kui
nij, kui xi tífi kontranuu. Yo nga xin nankinuu
kó tu tίνimasúnnú ej asunntej. ¹² Tu nku kixihí
tankinkoo yjonuu ajihin xuta xi najmi be Ntíaná.
B'a n'oo ndaha tsa b'a incha kuitsu nga najmi

nda t́ín'o. Tunga incha skuehé ni nda xi n'oo kó ts'íintsjohó Nt́ianá nístjin nga kuanki kuenta.

¹³ Ngat'ahá nga Nda Nt́ianá ts'enuu, kui nga chankjúhunnu ngayjee já xi tjíhin xá ei asunnteí. B'a n'oo nginkun nda títjun k'aku Roma ¹⁴ kó b'a n'oo nginkun já k'aku xi b'éxá nda títjun k'aku nga ts'ínnijéhe xi ch'on ts'ín kó nga kjanínk'a xi nda ts'ín. ¹⁵ At'ahá mjehe Nt́ianá nga n'oo ni xi nda. B'a ts'ín k'úéchjahanu ts'a xutá xi najmi be Nt́ianá kó najmi mankjihin ni xi ts'e.

¹⁶ Ndaínuu yjonuu nginkun Nt́ianá, tunga najmi tú n'echjénnú kjuandáínuu tsa k'uaintohoo yjonuu nga n'oo ni xi najmi nda. Tú sa ní tintsuhoo xi nkú ts'ín b'entu xutá xi ts'ínxát'ahá Nt́ianá. ¹⁷ Chankjún ngayjee xutá. N'etjó xi tá Nt́ihi Nt́ianá. Chankjún Nt́ianá. Nuú'yá'óhooon nda títjun k'aku Roma.

B'í ts'ín títuya Pedro ni xi tjíhin nga ts'ín xutá musu xi kich'atse

¹⁸ Jun xutá musu xi kich'atsenuu, chankjún já nt́ianuu kó nuú'yá'óhooon, najmi tú suba xi nda tjíyahá kó xi ma nimahá jun xi b'a n'ekoo. B'a ní tá n'ekoo xi kjan ts'ínkonuu. ¹⁹ At'ahá nda nginkun Nt́ianá nga ts'ín chúkjuá jámusu kjuá'un xi tíf'ajín, ndaha tsa najmi tjíhin nga kj'ujajín niu kai, tunga ts'ín chúkjuahá at'ahá ja kitsjáha yjohó Nt́ianá. ²⁰ Tunga tsa ch'on t́ín'o kó tsa as'ai tít'sín'unnuu já nt́ianuu kó t́ín'echjúkjuo, ¿mí ni chánkaha xi t́ín'o ma? Tunga tsa nda t́ín'o kó as'ai t́ín'e chúkjuo kjuá'un xi t́íbitjájíun, kuihí ni xu'bí xi nda nginkun Nt́ianá.

²¹ J'ajinnuu Nt́ianá nga n'oo ni xi nda kó nga n'e chúkjuo ni xi tú kjuandahá kuitjájíun, xi nkú tá

kits'ín Cristo nga un kíkíehē ngandanuu. Y'ejña chubayanuu, tū xi b'a tā n'ehenu. ²² Najmi kits'ín ngatitsun kō najmi kik'anacha. ²³ Nk'ie nga ch'on kik'ihin, najmi ch'on ts'ín kits'ínk'óya. Nk'ie nga un kíkíehē, najmi b'a kitsú nga k'uasje chjí ni xi tín'ehe. Tū sa ní aya ntsja Ntíaná y'ejñaya yjohō, at'aha kui xi kixi ts'ín kjuā.

²⁴ Kui kikjin kik'anji ngatitsunná nga kis'et'a kruu. B'a kits'ín tū xi kuayáha raá ngatitsuun kō naxu n'eé nga kuintsubáá. Kō tū ngat'aha nga kin'e'uhun Cristo, kui nga kin'enkihīnuu.

²⁵ Nistjin nk'ie xi nkú joyaha chutsanka xi ngji t'axín kamo, tunga nd'ai ja kik'óyak'un ngáhanu Nda bastuu, kui xi kunnuu.

3

B'i ts'ín títsuya Pedro xi nkú ts'ín tjihin nga k'uéntukō xinkjín xuta

¹ Kō jun xi tí'minuu jminchjín, chānkjún x'innuu. B'a ts'ín ni xi n'ehenu ts'íihin nga s'ejihin Ntíaná x'innuu. Najmi ni xi chūbo ts'ín nga s'ejihin x'innuu. ² Skue xi nkú ts'ín naxu tībankínkōo yjonuu kō nga tīyankjún Ntíaná.

³ Najmi tū tsjo n'ek'íesunk'o yjonuu, tsa nihi xi nkjún ts'ín k'úendo ntsjanuu kō tsa nihi xi nkjún ts'ín ngjút'o tōonsine kō tsa najyun xi 'yún chjí ndyjoō. ⁴ Tū sa ní ajin anīmanuu kas'e kjuatsjotjín xi najmi maha feya, kui xi tsuhu rā nga nda kas'eyanuu kō najmi stinta. Kui ní xu'bī xi 'yún chjīhī rā nginkun Ntíaná.

⁵ Nistjin nk'ie b'a ts'ín y'énda yjohō jminchjín je xi kis'e. Kui xi kama 'yún tak'un Ntíaná kō

incha kikienkjún x'ihin. ⁶ Xi nkúhu Sara, kui xi kint'é'éhen Abraham kō “Chá Ntiana” kitsúhu. Tsa ni xi nda n'ehenu kō najmi kuinkjún ni xi kamat'on, jun xi ntíhi Sara b'a.

⁷ Kō jun xi tí'minuú jáx'in, n'enkjínk'un sisiun xi nkú ts'in kuintsubakoo chjuúnnuu. Chankjún at'aha najmi ndjá tjiyaha xi nkúhu jun, kō at'aha jun kō kui ta ñja n'ekjáínkōhōo kjuandaha Ntiana nga kuintsuba tík'un. B'a ts'in tintsubakoo tū xi najmi chumi nihi xi k'uéchjaha rá nga chubakoo Ntiana.

B'i ts'in tsakúya Pedro xi nkú ts'in tjihi nga kuintsubaá

⁸ Kō ni xi fekuhu, nda ts'in tintsubakoo xinkiu. B'i ngján chase nimohōo kō n'etjō xinkiu at'aha nts'o mahanu. N'e'yún tak'un xinkiu kō nimakjua katumo. ⁹ Najmi tū n'es'echjiú tsa ch'on tín'enuu kō najmi tū én ch'on tsu n'ek'óyo tsa ch'on tí'minuú. Tū sa ní chubantjō nginkun Ntiana xi nkú tít's'innuu, at'aha tū xi nda ts'ínkōhonu Ntiana, kui nga kichj'ajihinnuu.

¹⁰ At'aha b'i tít'su xujun éhen Ntiana:

Xi mjehe ts'íntjo nistjin xi y'a,
kō mjehe nga tsjo ts'in kj'uaaha nistjin,
kui xi kat'éch'ohō njai én ch'on tsu,
kō najmi tū katitju ts'a én tsank'á.

¹¹ Kats'in t'axihin yjohō kjuach'onk'uun,
kō kats'in ni xi nda.

Katangisjai kjuajyu kō kat'ejñajin.

¹² At'aha Ntiana basehe xutā xi naxu ts'in,
kō nda basínñjuhu ni xi 'mihī nga chubako,
tunga fi kontrahá rá xi ch'on ts'in.

B'i ts'in tsakúya Pedro xi nkú ts'in s'eyaná tsa kjuanima kuitjáján

¹³ ¿Yá xi ch'on ts'ínnu tsa ngayjehe k'un n'oo ni xi nda? ¹⁴ ¡Á b'a nda tjíhin ts'ajun tsa nk'ie nga tín'o ni xi naxu tjín títitjajún kjuanima! Najmi tu binkjun xuta ko najmi tu nkjún manuu. ¹⁵ Tu sa ní chankjún Cristo ajin animanuu, at'aha kui xi Nda Ntjanuu maha. Ko tintsuba ndo nga kamanuu k'úinyohoo xi ngjuásjaiyanuu ngat'a ts'e kjuanda xi tichuyóhoo.

¹⁶ Tunga nimakjuahá n'esjo yjonuu ko chankjún jóo nga b'a n'oo. Najmi tu chumi ni chuba n'ek'anjiu yjonuu, tu xi nk'ie nga chubayanéhenuu kjuasuba kasakúhu ra xi tinchjatit'ainnuu ngat'aha xi nkú ts'in naxu títbankínko yjonuu nga yjankiu Cristo. ¹⁷ Tsa ni xi kjuanima títitjajíhinu, b'a katuma tsa Ntjaná b'a ts'in mjehe. Tunga ngat'aha ní nga nda tín'o b'a katumanuu, najmi ngat'aha nga ch'on tín'o.

¹⁸ At'aha kui nihi xi ta j'ajin Cristo. Nkuhú nityá k'ien tu xi kits'ínndyajnahu ngatitsuhun xuta. Xi naxu nginkun Ntjaná un kíkíehé ngandaha xi najmi naxu nginkun Ntjaná. B'a kamaha tu xi ngjikhoná nginkun Ntjaná. Kui xi ngat'a ts'e yjonintehe kin'ek'ien tunga ngat'a ts'ehé espirituhu kin'ekj'áiyaha. ¹⁹ Ko espiritú nk'ie nga ngjik'iénijmíhi xi ja k'ien xi kjintuyá'yún, ²⁰ xi najmi kint'é'én nistjin nga y'ejña Noe nk'ie, kui nistjiun nga tsakúchji kjuatsentaha Ntjaná nga kikuyá tsa ngjuakj'áha ra animaha xuta nk'ie nga tít'sínnda tsutsu chánkoo Noe. Jin mahá xuta xi

kits'ínk'an_{kihi} ntóo nk'ie nga in_{cha} jas'en tsutsu chánkoo.

²¹ Ntóo y'ejña chji títjun xi nkú ts'ín kits'ínk'an_{kinuu} ntánijuo nk'ie nga saténtáá. Tunga nk'ie nga saténtána, n'ek'an_{kiná} at'aha j'áiyaha Jesucristo ngabayoo. Najmi saténtáá tsa tu xi chjuxíhin kjuachuntíhi yjonintená. B'a ní n'ená tu xi tíbinchisjáíhiná nga je s'eyahaná nginkun Ntíaná. ²² Ngjinji Jesucristo nk'a ján ko tijnat'aha Ntíaná. Nt'é'éhen ntítsjee, xi tjin yaha xá ko xi batéxuma.

4

B'i ts'ín títsuya Pedro ni xi k'úéch'ohó yjoná

¹ Tu ngat'aha nga un kikiehe Cristo nga kik'a yjoninnte, kui nga tjehe ruu yjonuu nga ta kui niu xi kjuajin. At'aha xuta xi ja j'ajin kjuanima, kui xi ja y'ejña ngatitsuun. ² B'a in_{cha} kits'ín tu xi nistjin xi k'ua saha najmi ta k'úéntuhu xi nkú ts'ín nchjaha animaha. K'úentu ní xi nkú ts'ín mjehe Ntíaná. ³ Ja j'a xi nkú n'e tintsuboo nistjin nk'ie, nk'ie nga kin'o ni xi tsjoho xuta xi najmi be Ntíaná, ko kik'a_{into}hoo yjonuu nga kin'o tu mí nihi ni, ko kin'o ni xi nchjaha animanuu, ko kama ch'iu, ko kik'ohoo kjuatsjo animanuu, ko tu nku kjuatsjohó kama mjenuu, ko kiyankjún ntia ch'onk'un xi ts'inn_{da} xuta.

⁴ Xuta xu'bo najmi mankjihin á najmi ta n'ekohonu ni ch'onk'un xi tu ni xí jahá kits'ínkjas'ehen yjoho. Kui nga nd'ai ch'on ts'ín nchjayanehenuu. ⁵ Tunga tjihin ni nga ts'ínkjas'en kuenta nginkun Ntíaná. Kui xi ja tjindaha yjoho nga kuasehe mí nihi xi kits'ín nga nkúnkú xi

tj́intu t́ík'uun kó xi ja k'ien. ⁶ Kui kjuaha nga ta kis'enijmíhi ra xi ja k'ien én nda tsuhu Ntíaná, tu xi k'úentu t́ík'uhun espírituhu xi nkú ts'ín mjehe Ntíaná, ndaha tsa ja kichasehe xi nkú ts'ín y'entu asunntee.

B'i ts'ín tsakúya Pedro nga nda n'exákaá ni xi kitsjáná Ntíaná

⁷ Ja t́ibichú tiña nístjin nga n'ekje ngayjee ni xi tjín. Kui nga chase sinsihín ruu ni xi n'oo kó najmi tu n'ekj'áíyo nga chubakoo Ntíaná. ⁸ 'Yún mjena nga n'etj́o xinkiu, at'aha kjuatjoo nkjin nkjún ngatitsun ts'ínndyjajnu. ⁹ N'ekj́ohoon xinkiu ni'yanuu kó tsjo kat'enuu nga b'a n'oo.

¹⁰ Xi nkú nga ts'ín xkí kjuanda xi kin'ekj́ohoon nga nkúnkú, b'a ts'ín n'e chjónjihín xinkiu kui niy. Ngandaha xinkiu katumachjén kjuandoo, at'aha tjíhin nga nda n'e chjón nga nkúnkú kjuandaha Ntíaná xi kin'ekjas'ennuu. ¹¹ Tsa tjín xi kuinchja, én xi t́itsjáha Ntíaná kui xi kanchja. Tsa tjín xi kuasinko xuta, katasinko xi nkú ts'ín tjíña nga'yún xi t́itsjáha Ntíaná. B'a ts'ín ajihín ngayjee ni xi n'oo sakúhu ra kjuachánka Ntíaná. B'a kama at'aha Jesucristo yjankiu. Kui xi kas'ehe kjuachánka kó nga'yún santaha tu nkjéhe ni. B'a katuma.

B'i ts'ín tsakúya Pedro xi nkú ts'ín ndjá kuinchajián ni xi ts'e Ntíaná

¹² Tjona jun, já nts'e. Najmi tu katuma nkjúnnuu ni xi t́imat'on nga ndjá t́ichjut'ayák'unnuu, tsa b'a kamanuu tsa ni xi kj'aí kui nij. ¹³ Tu sa ní tsjo kat'enuu nga t́sakút'anuu kjua'un, kjua'un xi ta j'ajin Cristo, tu xi 'yún tse katumaha kjuatsjonuu nístjin nga kama chji kjuachánkaha Cristo. ¹⁴ Tsa

ch'on tí'minuu at'ahā Cristo yjankiu, já b'a nda tjiḥin ts'ajun! At'ahā Espirituḥu Ntjaná tijnajinnuu, Espiritu xi tjiḥin kjuachánka. ¹⁵ Tjín xi un behe at'ahā animā ts'ínk'ien, kō tsa ndyjé ts'ín, kō tsa ch'on ts'ín, kō tsa chubā tsungijihín yjohō kjuā xi tjiḥin kj'ái xutāha, tūnga najmi b'ahā katuma ajinnuu. ¹⁶ Tūnga tsa tjín xi un tíbehe at'ahā Cristo kits'ínkjas'ehen yjohō, najmi tū katuma subahā. Tū sa ní kats'intsjohō Ntjaná at'ahā Cristo tjenki.

¹⁷ Ja chubā nga kuatuts'ihín ra Ntjaná nga kuasehe mí nihi xi ts'ín xutā. Xutā xi ts'e k'uāhā rā. Tsa ṇā kuatuts'ínkohoná, ṇnkú sa ts'íhín xi najmi tít's'ínkjáihín én nda tsuhu Ntjaná? ¹⁸ Tsa 'ni b'anki xi naxu ts'ín, ṇyá xi behe nkú k'úé ts'e xi najmi benkjún Ntjaná kō xi tít's'ín ngatitsun? ¹⁹ Kui b'a maha, xi f'ajihín kjuanimā nk'ie nga Ntjaná tít'sjante, kats'ínkjas'en animāhā aya ntsja xi kits'índahā, kui xi ma 'yún tak'aán, kō tū nkú ndahā kats'ín.

5

B'í ts'ín tít'suya Pedro xi nkú ts'ín chasehe xutā nínkuḥu Ntjaná

¹ An xi ndachá ajihín xutā nínku. Tunkán kikiēkohona kjuanimāhā xi j'ajin Cristo kō tā an xi sakút'ana kjuachánka xi s'ejña chji ndyjun nkiní. Tíbankihí jáchāhā xutā nínku xi tjín ajinnuu. ² Chúḥuun chutsankahā Ntjaná xi kin'ekjas'ennuu. Chasohō, tūnga najmi tū chasehé ruu xi nkúhu tsa kjuā'yún tín'ehenuu. Ngayje níhi k'un chasohō xi nkú ts'ín mjehe Ntjaná. Kō tā ndaha tsa toon mjenuu, tsa kui

kju_aha nga ch_ase_her_uu. Ch_aso ní_hi at'ah_a mjen_uu nga ch_aso_ho xut_a nín_ku.

³ Najmi t_u ndjá n'ek_oo xut_a xi kin'ekúnntan_uu. T_u sa ní t'ejña chubayoh_o xi nkú incha ts'ín xut_a nínku_hu Nt_ianá. ⁴ B'a ts'ín nk'ie nga kj'uaíkúchjihi yjoh_o Nd_a bastu k'ak_u, n'ekjóh_oon chj_ihi kju_achánka xi najmi mah_a fe.

B'i ts'ín tít_suya Pedr_o mí nihi xi ch_aseé_he nga ku_intsubáá

⁵ K_o t_a jun xi tí'min_uu já xúnkú, t_ibankin_uu nga ch_ankjún jácháha xut_a nínku. Ngatento b'i ngján nímakjua n'esjo yjon_uu nginkun xink_u, at'ah_a b'i ts'ín tjít'a:

Nt_ianá fi kontrah_a xi ngak'un,

tunga tsjáhá r_a kju_anda xi nímakjua tjíntuyáha.

⁶ Kui nga n'e nímakjuahanu yjon_uu kinte nga'yún chánkaha Nt_ianá, t_u xi kui k'uasjenk'ahan_uu nk'ie nga kuichú chub_a. ⁷ Nt_ianá n'ekjas'oh_oon ngayjee ni xi kjintah_an_u, at'ah_a kui xi kjintah_a r_a jun.

⁸ Ch_ase chubayoh_o ni xi n'oo k_o tintsuba ndo, at'ah_a ndanindoo xi nd_a kontr_an_u maha. Tsú'ba xi nkú joyaha xa xi t_ib'éntsji nga t_ibangisjai xut_a xi kjine. ⁹ Tankín kontroh_o k_o ndjá t_inchajiun nga s'ejinn_uu Nt_ianá. At'ah_a yo nga t_a kui kju_a'uhun xi tít'sín chúkju_a já nts'o xi tjín nga ngúsuh_un asunntee.

¹⁰ Nk'ie nga ja un kaben_uu chuba nistjin, Nt_ianá kikjin, kui xi tsjáná ngayje t_ikjá kju_anda, kui xi Crist_o kits'ínchén nga j'ájinná nga sakúná kju_achánkaha xi najmi mah_a feya, ts'ín nga k_amo xi tjíhin nga k_amo, tsjá nga'yún_uu, ndjá

ts'íínkinchánuu kò najmi tã tsufi kuínchahanu.

¹¹ Kui xi tũ nkjéhé ni tjiín nga'yún. B'a katuma.

B'i ts'ín kits'ínkje Pedro xujuin

¹² Silbano xi nda nts'é xihín, xi kixi fiko xáha, kui xi tsasinkona nga kits'inntá xujuin. Chubahá ni xi títet'ánuu nga títjaniyánuu kò tíxinya kixínuu nk'ie nga ni xi tji't'a ei, kuihí xi kjuándaha Ntíaná. Ndjá tinchajiun kjuando.

¹³ Títj'ínkjinuu kjuasuniña xutã ninku xi tjin ante Babilonia. Kui xi tã j'ájihín Ntíaná xi nkúhu jun. Tã títj'ínkjinuu kjuasuniña Marko, kui xi ntína xihín.

¹⁴ B'i ngján tsjo n'e súníñohoo xinkiu.

Kas'enuu kjuajyu ngatento jun xi tintsujihun Cristo.

Éhēn Ntīanā
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

e05183c2-7c34-5cdd-8c78-15ea51bd8cbb